

La scola rumantscha è già ina scola bilingua

■ (lr) **Il resultats dal studi da la Scola auta da pedagogia dal Grischun davart la cumpetenzza da scriver procuran per part per vivas discussiuns.** *Urs Cadruvi*, il secretari general da la Lia Rumantscha, deplorescha ch'i vegnan tragas parzialmain conclusiuns nunponderadas e falladas en connex cun quel inventari prezios. La Lia Rumantscha beneventass ina discussiun da princip che represchenta ina gronda part da las opiniuns.

«La scola rumantscha è già ina scola bilingua e per il territori rumantsch la meglra varianta ch'ils models da scola bilings», di Urs Cadruvi, il secretari general da la Lia Rumantscha (LR). Tenor Cadruvi porscha il studi da la Scola auta da pedagogia dal Grischun (SAPGR) davart la cumpetenzza da scriver preschent ina buna basa da discussiun areguard la dumonda tge posiziun ch'il rumantsch ha en l'avegnir en scola. I sajan però d'evitar conclusiuns nunponderadas e schizunt falladas, manegia Cadruvi e fa attent ad exempels ch'ins ha pudì leger en la pressa. Ins stoppia per exempel avoir il curaschi da metter en dumonda las consequenzas che la midada dal seminari da scolasts a la scola auta da pedagogia ha per la scolaziun linguistica da las scolastas e dals scolasts, perquai che la SAPGR n'haja oz betg pli las medemas pussaivladads da garantir quella adequatamain. Cadruvi è da l'avis che quel fatg saja a lunga vista problematic per il rumantsch, cunquai ch'i vegnia adina pli grev da chattar scolastas e scolasts qualifitgads linguisticamain. La remartga dal rector da la SAPGR *Johannes Flury* ch'ins stoppia ponderar sch'ils giuvens veglian anc scriver rumantsch, n'è segund Cadruvi betg la soluziun. Il secretari da la LR na vul però betg dramatisar, anzi: I saja impurtant d'analisar objectivamain ils resultats dal studi, senza opponer in a l'auter ils systems da scola e las regions.

Discussiun per chattar propostas per soluziuns

La Lia Rumantscha vesa che differentas instanzas èn prontas per ina discussiun. Urs Cadruvi annunzia da tschertgar il proxim temp il contact cun la Scola auta da pedagogia dal Grischun, cun las conferenzas da scolastas e scolasts ed eventualmain era cun ulteriurs partenaris da scola per pudair manar ina discussiun.